

河朔訪古記卷中

元

納

新

撰

魏郡部

魏郡部彰德路禹貢冀州之域商河亶甲居于此戰國
爲魏之鄴地秦爲上黨邯鄲二郡地漢置魏郡曹操受
封于此稱鄴都後趙石虎前燕慕容雋並據之後魏曰
相州東魏曰司州北齊改爲清都郡唐曰相州又改鄴
郡梁置昭德軍石晉改彰德軍金升爲彰德府國朝先
屬真定路後改彰德路立總管府領司一縣三安陽湯

河朔訪古記

卷中

一

陰臨漳州一林州

彰德路城中宋隸安陽縣國朝置錄事司以領之城之
外仍屬安陽縣城郭周十九里總管府錄事司治及安
陽縣治皆在城內焉

安陽縣春秋爲戲陽戰國爲魏甯新中邑秦更名安陽
漢廢以其地入蕩陰屬河內郡魏併入鄴晉置安陽屬
魏郡後周移相州及鄴縣于安陽故城治此隋復曰安
陽尋改堯城屬魏郡唐以安陽爲相州治改堯城曰永
定宋改永定爲永和尋省入安陽及省鄴縣分其地半

入焉宋金皆曰安陽縣國朝因之爲彰德路倚郭縣
湯陰縣古羸里之地戰國爲魏之蕩陰邑漢爲蕩陰縣
屬河內郡晉屬魏郡後魏省隋改蕩源縣大業二年省
唐初分安陽縣地入蕩源屬衛州貞觀元年以蕩水微
溫改爲湯陰縣屬相州宋金國朝皆因之爲彰德路屬
縣云

臨漳縣本漢鄴縣地晉建興二年以愍帝諱改名臨漳
東魏孝靜置鄴縣于今鄴鎮又別置臨漳縣周武帝平
齊自鄴城移縣于今治仍屬魏郡隋開皇三年改隸相

河朔訪古記

卷中

二

州十年分縣地置長樂縣大業十年始築縣城暨唐及
宋金皆爲臨漳縣國朝因之爲彰德路屬縣云

林州漢置隆慮縣東漢改隆爲林隋析置湛陽縣後改
置巖州金爲林州國朝至元二年復爲縣又併輔巖入
焉未幾復爲州割輔巖入安陽仍以州隸彰德路

磁州禹貢冀州之域春秋屬晉戰國屬趙秦爲邯鄲郡
地漢爲魏郡趙國地晉爲廣平郡地後周置成安郡隋
置磁州唐天祐改惠州尋復磁州宋曰滏陽郡金以隸
彰德國朝屬廣平路領縣四曰滏陽邯鄲武安成安

淦陽縣漢爲武安縣地魏置臨水縣屬廣平郡後周置
淦陽縣屬成安郡隋置磁州治于此唐宋金並因之本
朝爲磁州倚郭屬縣

按磁州淦陽縣惟金以之隸彰德

元本屬廣平路蓋是書爲記遊覽古而作路徑淦陽歷
記所見實未遍歷洛邢也故附見于彰德路云

黃華谷天平山彰德之西九十里曰林州卽古林慮縣
也州西北二十里曰黃華谷谷多秋菊故名昔金翰林
學士熊岳王公庭筠子端皆隱居谷中號黃華山主所
居曰讀書巖公文章書法高出流輩字學米元章墨竹

河朔訪古記

卷中

三

類文湖州金章宗所謂昔人君子者也谷之西南諸峯
峭拔奇秀林木陰翳仙宮佛廟金碧輝映巖崖泉石名
號百什不可窮紀其迸珠簾桃花巖者不減天台赤城
之勝其最知名者谷南之天平山猗谷寺也猗谷莫夜
陰崖石壁間燦然作金光若燈火神幻不可致詰前賢
多作歌詩以紀曰金燈集

安陽縣北三十里臨漳縣南十五里鄴鎮之西曰蔡村
有濁流奔迅俗謂之漳河也禹貢曰覃懷底績至于衡
漳水經云濁漳之源出晉甯路長子縣西發鳩山東北

流過壺關屯雷潞縣合眾山之水其流始大又東過武安縣有清漳水自涉縣東南來注之其水合流謂之交漳口

清漳源出上黨沾縣大龍谷東北過磁州武安與濁漳合

遂東過鄴縣西又東過三戶津又東北過洺州曲周平恩二縣又東北過冀州又東北過景州東光縣弓高鎮又東北過瀛州樂壽縣景城鎮又東北過平舒縣而入于海云漳水自出山至入海凡行一千六百里按史記魏文侯時使西門豹爲鄴令豹卽發民鑿十二渠引漳水溉民田民皆煩苦豹曰民可與樂成不可與慮始今雖患苦百歲後期令父老子孫思我言民

河朔訪古記

卷中

四

後果得其利至今鄴人祠祭不絕又西漢書文侯曾孫襄王嘗與羣臣飲酒祝曰令吾臣皆如西門豹之爲人臣也史起進曰魏氏之行田也以百畝鄴獨二百畝是田惡也漳水在旁豹不知用是不智也知而不與是不仁也仁智未盡豹何足法于是襄王使起爲鄴令遂引漳水溉田揭水東注號天井堰里中作一二燈燈相去三百步使相灌注一注分十二流皆懸水門鄴人名曰晏陂澤河內之民以致殷富民歌之曰鄴有賢令兮曰

史公決漳水兮灌鄴旁終古烏鹵今生稻梁今史漢所載二說不同余疑當時豹嘗鑿渠而後湮廢至起紹修故民歌之今併錄焉十二月早出彰德北門至蔡村西行三十里陘處作土橋以渡時漳水退縮層冰峩峩逐流東下土人云春夏水漲至與岸平闊可數里號小黃河又曰水旁多石子俗傳可以暖腹又有紋石濱河之民取以爲器貨之

安陽橋在安陽縣北五里橋下卽洹水也洹水出上黨洹氏縣洹山山在長子縣東過隆慮縣北黃水注之又

河朔訪古記

卷中

五

東北出山連逕殷墟東北過鄴城南謂之新河又東逕安陽故城東過內黃縣北入于白溝云春秋左氏傳言聲伯夢涉洹水杜預注曰洹水出汲郡林慮縣李宗諤以此說爲然遂言洹水源出林慮西北平地湧出初甚微細東流九十里至安陽縣界泉脈漸大又曲而東北入大名府洹水縣界今按水經所言洹氏在澤州高平縣西並無洹水蓋縣邑遷改不常故酈元所記有異同耳余嘗觀許敬宗論禹貢道沅水東流爲濟入于河溢爲榮其說甚詳蓋天下之水無有不發源于山其有自

平地出者皆泆流再發也且濟水之源出王屋山之顛
泆流至平地再出卽今濟源縣濟瀆廟泉是也今李宗
諤第見洹水初起林慮遂以水經所記爲異殊不知林
慮乃泆流再發也呂忱字林許慎說文皆云洹水出晉
魯之間又言林慮黃水發源神囿之山谷東流至谷口
潛入于地下東北十里復出于柳渚然則洹水泆流至
林慮再出蓋可信矣

蕩水出湯陰縣西石尙山

案太平寰宇記作牟山

東流

經縣故城縣因水以取名又東北至內黃縣入于黃澤
河朔訪古記

卷中

六

唐貞觀元年改爲湯水以其水微溫也

羨水在羨里北二里有橋曰羨橋橋下卽羨水也水經
曰羨水出湯陰縣西北四十里西山韓大牛泉東經羨
城之北積水成淵方十餘步深一丈餘又東至內黃縣
與防水會又東歷黃澤而入蕩水云

宜師溝在湯陰縣西南三十五里宜師站又在縣西南
二十七里又有宜師橋在站側

鄴宮元帝禪晉晉常館帝于此光熙元年夏五月馬牧
帥汲桑叛敗魏郡太守馮嵩遂陷鄴城燒宮旬月煙燄

不滅曹魏之殿閣蓋于此時盡矣至石勒將營鄴宮以
廷尉續咸尙書令徐光切諫而止後因霖雨中山西北
暴水漂巨木百餘萬株集于堂陽勒大悅謂公卿曰諸
君知此非爲災也天意欲吾營鄴宮耳于是令都水使
者張漸少府任汪等監營勒親授規矩而建焉

鄴都南城在鎮東南三里半按魏孝文天和十八年自
雲中遷都洛陽經鄴宮雷數日臨引軍發懸飯一瓢于
城門上而去尙書崔光語人曰掛飯者懸殮也後世元
孫必興于此矣至孝武永熙三年高歡逼帝西入關乃

河朔訪古記

卷中

七

立清河王亶之子善見于洛陽東北改元天平以十月
丙子車駕北還于鄴十一月庚寅至鄴居北城改相州
爲司州牧以魏郡林慮廣平陽邱汲郡黎陽東濮清河
廣宗等爲皇畿于城東置臨漳縣城西置鄴縣城東北
置成安縣臨漳三百鄉鄴縣五百鄉成安二百五十鄉
二年八月發眾七萬八千營新宮元象元年九月發畿
內十萬人城鄴四十日罷二年帝徙御新宮卽南城也
又鄴中記云城東西六里南北八里六十步高歡以北
城窄隘故令僕射高隆之更築此城掘得神龜大踰方

丈其堵堞之狀咸以龜象焉按北史高隆之傳云隆之領營構大將以十萬夫撤洛陽宮殿運于鄴構營之制皆委隆之增築南城周二十五里以漳水近城乃起長堤爲防又鑿渠引漳水周流城郭以造水碾磴云

銅爵金鳳冰井三臺皆在臨漳縣鄴鎮東南二里古鄴都北城西北隅因城爲基三臺相距各六十步中爲銅爵臺南爲金鳳臺北爲冰井臺此蓋曹操于漢獻帝時爲冀州牧所築也鄴中記曰建安十五年銅雀臺成操將諸子登樓使各爲賦陳思王植援筆立就金鳳臺曹

公初名金虎至石氏改今名冰井臺則凌室也金虎冰井皆建安十八年建也魏銅雀臺高一十丈有屋一百二十間周圍彌覆其上金虎臺有屋百三十間冰井臺有冰室三與涼殿皆以閣道相通三臺崇舉其高若山云後至趙石虎三臺更加崇飾甚于魏初于銅雀臺上起五層樓閣去地三百七十尺周圍殿屋一百二十房房中有女監女伎三臺相面各有正殿上安御牀施蜀錦流蘇斗帳四角置金龍頭銜五色流蘇又安金鈕屈戌屏風牀牀上細直女三十人牀下立三十人凡此眾

妓皆宴日所設又于銅爵臺穿二井作鐵梁地道以通井號曰命子窟于井中多置財寶飲食以悅蕃客曰聖井又作銅爵樓巔高一丈五尺舒翼若飛南則金鳳臺有屋一百九間置金鳳于臺巔故名北則冰井臺有屋一百四十間上有冰室室有數井井深十五丈藏冰及石墨石墨可書又蕪之難盡又謂之石炭又有窖粟及鹽以備不虞今窖上石銘尙存焉三臺皆磚甃相去各六十步上作閣道如浮橋連以金屈戌畫以雲氣龍虎之勢施則三臺相通廢則中央懸絕也又按北史齊文

宣天保二年發丁匠三十萬人營三臺于鄴因其舊基而高博之構木高三十七丈兩棟相距二十餘尺工匠危怯皆繫繩自防文宣登棟脊疾走了無怖畏時復雅舞折旋中節觀者莫不寒心又召死囚以席爲翅從上飛下不死免其罪戮臺成改銅爵曰金鳳金虎曰聖井冰井曰崇光云至後建德七年三臺遂廢及隋大業三年章孝寬討尉遲迥遂焚毀蕩徹了然空虛矣十二月余過鄴鎮登三臺眺望見其殘邱斷隴而問諸山僧野老猶能干荒烟野草中指故都西陵之遺跡相與悲慨

且言銅爵臺今周回止一百六十餘步高五丈上建永甯寺金鳳臺周回一百四十餘步高三丈上建洞霄道宮冰井臺則北臨漳水周回止一百餘步高三丈爲漳水衝嚙一角已崩缺矣余聞世傳鄴城古瓦研皆曰銅爵臺瓦磚研皆曰冰井臺磚蓋得其名而未審其實夫魏之宮闕焚蕩于汲桑之亂及趙燕魏齊代興代毀室屋尙且改易無常况易壞之瓦礫其存于今者亦幾希矣按鄴中記曰北齊起鄴南城其瓦皆以胡桃油油之澆卽祖珽所作也蓋欲其光明映日歷風雨久而不生

河朔訪古記

卷中

十

蘇耳有筒瓦者其用在覆故油其背有版瓦者其用在仰故油其面筒瓦之長可二尺闊可一尺版瓦長亦如之但闊倍耳今其真者皆當其油處必有細紋俗謂之琴紋有白花謂之錫花相傳當時以黃丹鉛錫和泥積歲久故錫花乃見然亦未言其信否也古磚大方可四尺其上有盤花鳥獸之紋又有千秋及萬歲之字其紀年非天保卽興和蓋東魏北齊之年號也又有筒瓦者其花紋年號與磚無異蓋當時或用以承簷溜故其內圓外方有若筒然亦可製而爲研然則世傳有古鄴之

研多北齊之物耳鄴人有言曰曹操銅爵臺瓦其體質細潤而其堅如石用以爲研不費筆而發墨此乃古所重者而今絕無蓋魏之去今千有餘年若其瓦礫皆磨滅爲塵矣且齊之磚瓦至今亦五六百年村民搗工求之往往聚眾數百人而踰年不得一二全者則鄴人所謂銅爵冰井者蓋特取其名以炫遠方其不知者從而信之今鄴人僞造彌眾惟嘗識者知其不如古耳故荆國王文公有詩曰吹盡西陵歌舞塵當年屋瓦始稱珍甄陶往往成今手尙記虛名動世人蓋當時亦有此嘆

河朔訪古記

卷中

十一

也夫古之眞瓦不期于爲研今之僞瓦止期于爲研其甄陶固精于古然其質終燥其用不久者火力勝故也雖和以黃丹鉛錫烏能作潤哉惟古之磚瓦散沒土中千餘載感霜露風雨之潤火力既盡復受水氣此其所以含蓄潤性而滋水發墨也

華林苑在臨漳縣鄴城東二里苑後卽南鄴城之西也按石虎時有沙門吳進言趙暹將衰晉當復興宜役晉人以壓其氣虎于是使尙書張羣發近郡男女十六萬車萬乘運土築華林苑周回數十里及築長牆數十里

趙攬等上疏切諫虎大怒曰牆朝成夕壞吾無恨矣乃從張羣以燭夜作起三觀四門通漳水皆設鐵扉暴風大雨死者數萬人又鑿北城引水于華林園城崩壓死百餘人虎于苑中植人間名果作蝦蟇車箱闊一丈深一丈合土載花木所植無不榮茂至高齊武成間增飾華林苑若神仙所居改曰仙都苑苑中封土爲嶽皆隔水相望分流爲四瀆因爲四海匯爲大池曰大海海中置龍舟六艘其行舟處可廿五里又爲殿十二間于海中五嶽各有樓觀堂殿四海中亦有宮殿洲浦其最知

河朔訪古記

卷中

十三

名者則北岳之飛鸞殿北海之密作堂也飛鸞殿十六間以青石爲基珉石爲礎鐫刻蓮花內垂五色珠簾緣以麒麟錦楹柱皆金龍盤繞以七寶飾之柱上懸鏡又用孔雀翡翠山雞白鷺毛當鏡作七寶金鳳高一尺七寸口銜金鈴光彩奪目人不能久視也密作堂周回廿四架以大船浮之以水爲激輪堂爲三層下層刻木人七彈箏琵琶箏篪胡鼓銅鈸拍板弄盤等衣以錦繡進退俯仰莫不中節中層刻木僧七人一僧置香奩立東南角一僧執香爐立東北角五僧左轉行道至香奩所

以手拈香至香爐所其僧授香爐于行道僧僧以香置
爐中遂至佛前作禮禮畢整衣而行周而復始與人無
異上層作佛堂旁列菩薩衛士帳上作飛仙右轉又刻
紫雲左轉往來交錯終日不絕皆黃門侍郎博陵崔士
順所製奇巧機妙自古罕有其苑中樓觀山池臺殿自
周平齊之後皆廢毀矣今其基址詢之故老猶能記其
萬一余以記載可考者錄敘如右

彰德路總管府治後花園曰康樂園昔宋至和中韓魏
公以武康之節歸典鄉郡因闢牙城作甲仗庫以備不

河朔訪古記

卷中

三

虞遂大修亭池名曰康樂園取斯民其樂康時之義故
云魏公自爲記書而刻諸畫錦堂上園中舊有七堂曰
畫錦燕申自公榮歸忘機大悲涼堂又有八亭曰御書
紅芳求已迎合狎鷗觀魚曲水廣春又有休逸飛仙二
亭故老相傳黃堂廳事肇啓建于節度韓重贊宋太宗
歸自河東視其廳曰朕之所居亦不過也上欲畱宿重
贊奏曰臣以一方之力積歲成此今陛下居一夕卽虛
之矣不免勞民重建乞賜守臣豈勝榮幸上乃命設幄
宿于廳下而去至魏公大加完飾郡解園亭雄壯華麗

甲于河朔又傳休逸堂魏公取鄴城冰井臺四鐵梁爲
柱初鐵梁棄鄴臺歲久光瑩無辭剝人以爲神物訶護
不敢動及以爲堂柱羣疑始定今園亭廢毀皆不可考
惟飛仙臺基在府治敏功堂後今構觀音堂其上臺北
十餘步踰小巷後園有休逸堂基面山亭基金節度完
顏熙載作養素樓其上今廢其碑尙存其餘則不可知
矣畫錦堂記碑今移至魏公祠堂云公有康樂園詩曰
名園初闢至和中思與康時共樂同一紀年光雖易老
萬家春色且無窮歸來敢銜吾鄉勝到此須知舊鄴榮
荒基餘皆不復辨矣

河朔訪古記

卷中

古

病守縱疲猶強葺欲隨民適醉東風十二月余至彰德
府治後因游康樂園今皆菜畦麥隴可考者惟休逸臺
彰德路城中富財坊南街西第二巷閭門扁曰胡公里
故胡按察私第在焉公諱祗適字紹聞武安人也祖父
俱第進士公北度居相州六十年既卒監郡伊爾布哈
中順尊慕德望卽所居立胡公里

緱山書院彰德路城南門大街道左高綽門榜曰杜文
獻公緱山書院諱英字文玉信安人也避亂居雒陽謀

隱緱山故以此自號云甲辰閒尼瑪哈行省徵至彰德
辟爲諫議官不就遂隱居教授日與王鹿菴劉神川倡
和爲樂中統元年世祖聞其賢命爲大名等路提舉學
校官年七十卒葬安陽縣西十里王裕村今其孫秉彝
字德常以鄉貢進士積官中書左司郎中請建書院因
贈資德大夫翰林學士魏郡公諡文獻設緱山書院列
于學官云

省城湯陰縣東北三十五里有城周回一百步高二丈
土人呼爲雀城世傳文王厄于羑里武王築此城以望
河朔訪古記

卷中

五

之有赤雀見因名云
涼馬臺湯陰縣北十二里有臺高三十尺周回五百步
曰涼馬臺按鄴中記曰後趙石虎所築建武六年虎都
鄴洗馬于洹水築此臺以涼馬故以名云

觀音禪院八角井附彰德路城中豐安坊有寺曰觀音禪院

唐天禧二年所建寺有八角井父老相傳井中嘗有雲
氣如虹眾謂有寶探之其深不可測郡人周邯得崑崙
奴善入井曰水精使之入井底良久出曰一黃龍抱數
顆月明大珠熟睡水精驚亦病死初州城在井北避洹

水泛溢南徙乃包此井于城中云

隋龍興寺碑在彰德路北關外古寺坊東龍興寺寺前豐碑一通是爲隋龍興寺范陽張庭珪八分書其文則相州刺史越王撰蓋所謂信行禪師傳法碑也

陶唐廟在安陽縣西北六十里乞伏村廟有金應奉翰林文字同知制誥趙秉文所撰碑一通并書篆額後銘曰鬼神睢盱伏羲受圖人文權輿彝倫旣敘五穀旣敷唐文煥乎披昏挾塗藥民之愚有典有謨位非我娛萬民其孥丹朱其疏陸水其都人蠱其居吁嗟都兪思漸

河朔訪古記

卷中

六

于膚今其已夫祝焉忽諸道祠路隅田婦耕夫或祝或巫白馬同車清風肅如神來有無清漳之墟歲熟萬區神游藐姑明昌有道千載同符擊壤康衢走不知乎今世陶唐氏之民歟

湯聖王廟在安陽縣西北五十里廟有少中大夫山東東西道按察使胡祇遜所撰碑

羨里城文王廟羨城在湯陰縣北六里道左朱綽門門榜題曰羨里城周文王之廟其城周回二百五十步高二丈餘門榜則正議大夫河南江北道肅政廉訪使康

里回回所書也廟有一碑則太常博士借注戶部員外郎兼奉翰林文字胡祇通記大元至元六年夏十有二日建廟壁龕翰林承旨永年王磐五言古詩石刻一通按史記音義羗里蓋獄名也夏曰均臺商曰羗里周曰囹圄皆員土也又按史記崇侯虎譖西伯于商紂紂囚之羗里西伯迺演周易作六十四卦其臣閔天太顛之徒求有莘氏美女驪戎之文馬九駟及他奇怪因商嬖臣費仲獻之紂紂大悅乃赦西伯賜之弓矢鈇鉞使得征伐又曰紂囚文王將殺之或曰西伯聖人也不可殺

河朔訪古記

卷中

七

紂曰吾聞聖人有靈德吾將驗焉乃殺伯邑考醢之以食文王文王食之已而嘔于羗里之門外于是眾信文王爲聖人因以土封其嘔處謂之嘔子冢其冢今尙存土人訛爲狗子冢云王承旨鹿菴廟壁所刻詩曰羗水淺且清羗里餘荒城文王德如日曾此夷其明陝樹憩召伯箕山栖許生後人起敬愛木石含芳榮嗟爾一坏土耕犁未全平千秋不磨洗永被囚聖名我行蕩陰道過之爲停征念昔有殷季虐主方狂醒銛鋒戮賢聖若刈寸草莖左啖鄂侯脯右啜鬼侯羹茲時無羗里何以

紆淫刑羨里深杳杳羨里高亭亭君王在縲繼不異南
面聽淑氣發神慮滄和助心靈演開伏羲畫剖出天地
精一時雖冥昧萬古垂日星若無羨里拘易經何由成
易經在所重羨里那可輕康里公字子淵積官至遼陽
平章布呼密文貞王之子翰林承旨庫庫之兄父子皆
國之名臣也

西門豹祠漳水之上有祠門扁曰西門大夫之廟按魏
文侯使西門豹爲鄴令至鄴會長老問民疾苦對曰苦
爲河伯娶婦豹問其故曰鄴俗祀河伯巫視民女好者

河朔訪古記

卷中

六

云當爲河伯婦卽聘取治齋宮河上令女齋戒十日乃
洗浴粉飾如嫁狀令坐牀上浮河中行十餘里女乃溺
俗傳否則漂沒其民人久以爲然故三老廷掾歲斂民
錢數百萬止用二三十萬與巫祝共分餘錢持歸故民
有好女者皆遠逃去鄴民困貧其所由來久矣豹曰至
爲河伯娶婦願幸相告吾亦往送女眾曰諾至其時豹
往會其巫嫗年七十餘從弟子女十人皆單繒爲衣立
大巫後豹呼婦視其妍醜巫引女出帷豹曰是女醜不
足爲河伯婦煩大巫嫗入報河伯更求好女它日送之

卽使吏卒抱巫嫗投河中有頃曰何久也弟子當趣之
乃投一弟子河中有頃曰何久也復投一巫凡投三弟
子豹曰巫皆女子不能白事煩三老人白之復投三老
河中豹簪筆磬折向河立待顧曰巫嫗三老不來奈何
當使廷掾長者一人趣之皆叩頭流血豹曰河伯豈常
畱客哉于是眾誓不敢爲河伯娶婦皆罷歸矣淫祀遂
絕豹又鑿漳水溉田五百餘頃民甚德之因建祠云廟
有宋修祠碑一通則錢塘楊蒙所撰其略曰元祐八年
癸酉余奉檄策委定武將亂衡漳遲舟于客館父老集

河朔訪古記

卷中

九

琴堂下曰此地之東有祠云西門大夫雖時祭不乏而
廟制湫陋邑大夫君行農而謁焉愴然虔矚迺鳩工修
祠云其後辭曰漳水可涸兮君之澤方洋洋西山可頽
兮君之名方巍巍新厥宇兮神妥斯琢諸石兮來者師
十二月至祠下拜謁讀碑而退史云廟東北曰水樂浦
浦西五里俗謂之祭陌河卽西門豹投巫之所也

案晏

殊類要祭陌河作紫陌河

扁鵲廟碑在湯陰縣東南二十里伏道村村之道左一
碑題曰神應王扁鵲之墓其廟併在墓側廟有二碑一

碑教授張仲文撰一碑大中大夫江南瀾西道提刑按察使武安胡祗適撰墓旁生艾治疾爲天下第一今每歲充貢云伏道者昔商紂知獄繁民怨乃置防城以兵防羨里之囚又伏兵于道左故云廟壁有左司劉昂題詩一首曰昔爲舍長時方技未可錄一遇長桑君古今皆嘆服天地爲至仁旣死不能復先生妙藥石起甯效何速日月爲至明覆盆不能燭先生具正眼臺釐窺肺腑誰知造物者禍福相倚伏平生活人手反受庸醫辱千年廟前水猶學上池綠再拜乞一杯洗我胸中俗宋

河朔訪古記

卷中

辛

仁宗景祐元年九月詔封扁鵲爲神應侯因上疾愈從醫許希有之請今日神應王未知何代所封也

尉遲公廟碑彰德路城中畫錦坊後周太師蜀國公尉遲迴之廟在焉迴爲周將征伐有功初滅北齊以迴爲相州總管至隋文帝以計徵迴欲圖之迴乃率諸州舉兵數十萬及爲楊素韋孝寬高潁等師所敗遂上樓自殺至唐開元中州多怪厲刺史至輒死吏民疑懼于是刺史張嘉祐以迴死國難忠臣也爲立祠以祀之後刺史吳克復加以冕服初嘉祐之建祠也顏真卿爲記其

事蔡有鄰書之碑陰紀迴靈異之事言雨暘隨禱輒應
回風驅蝗使境內無害每至秋夜有雙鶴下集廟廷郡
人至今稱以爲異云唐張嘉貞宋璟皆刺相州有惠政
今並配食廟廷魯公所撰碑略曰有周上柱國蜀國公
河南尉遲迴字居羅按周書作薄居羅代人也因部立家遂雄
荒服父俟兒按周書作俟兜尙魏大祖姊昌樂公主贈太傅迴
仕魏爲散騎侍郎歷大丞相帳內都督尙金明公主進
爵車騎將軍領侍中尙書左僕射伐侯景有功詔兼梁
益等十八州事周之興也進蜀國公邑萬戶總秦衛文

河朔訪古記

卷中

三

康十四州事大司馬冊太師加上柱國授相州總管宣
皇晏駕京師將徵公公以隋公當權辭不受代公子魏
安公沁東之敗也公綠巾尙整按周書迴別統萬人皆綠巾錦袂號曰黃龍兵
猶背城請戰黃龍已潰則登樓自裁又云公凡事二代
易九朝忠不辱隋節能奉上唐武德中改葬表墓開元
丁丑乃建廟云開元二十六年二月二十一日華州鄭
縣尉閣伯璵敘祕書省校書郎顏真卿銘蔡有鄰書
彰德城中嘉惠曲畫錦坊故宋丞相魏國忠獻韓公琦
之廟在焉重門修廡中爲大殿殿背公像袞冕龍榻侍

從之臣相向拱立儼然廟堂氣象蓋公熙甯初力辭上
宰再典鄉邦未半歲河北地震水災命公安撫四郡移
鎮大名相人思之卽公畫錦坊故第築生祠以祠公廟
昔有宋中書舍人王靚所撰碑兵毀不存國朝重建廟
碑一通晉州判官高書訓所撰高公太原人官至國子
博士故尙書高鳴雄飛子也庭西畫錦堂記碑一通至
元間再摹而刻宋參知政事歐陽修撰翰林學士蔡襄
書龍圖學士邵必大篆世稱爲四絕碑云府學之西亦
有公祠堂宋鄂州嘉魚令邱鄜爲撰廟記其碑今置府
河朔訪古記

卷中

三

學儀門下安陽縣治之南護國顯應廟西隅亦有公廟
蓋宋敕建者郡人稱爲雙廟也至若大名府之廟碑則
丞相溫國文正公司馬光撰磁州之廟碑則知真定楊
子縣事徐薦撰其陝西之秦州河東之太原淮南之揚
州河北之真定暨中山府皆有公廟大河南北凡人所
至今皆祀之不絕也畫錦新廟殿壁龕公書畫錦堂詩
石刻一道詩曰重向高堂舉晏杯四年牽強北門迴故
園風物都如舊多病襟懷遂一開白髮恥夸金絡騎綠
陰欣滿石梁臺因思前彥榮歸者未有三曾畫錦來西

廡則有郡人緱山杜英所題詩扁詩曰輪囷日下五雲
飛此是先生唱第時龍上青天蛇有力鼠潛舊穴馮空
肥縱橫邊議三千牘照耀身名六一碑壞壁百年遺像
在郡人爭看錦爲衣按公薨于相之府治神宗震悼命
陪葬山陵其家懇辭乃命入內都知張茂則敕葬公于
安陽縣西北三十里豐安鄉天子御製碑文題曰兩朝
顧命定策元勲之碑命龍圖閣學士宋敏求卽墳所書
冊賜守墳寺曰傅孝報先之寺云十二月余偕下郊人
李亨至祠下謁拜讀庭下二碑及讀詩扁而退

河朔訪古記

卷中

三

安陽縣西北五里四十步洹水南岸河亶甲城有冢一
區世傳河亶甲所葬之所也父老云宋元豐二年夏霖
雨安陽河漲水嚙冢破野人探其中得古銅器質文完
好略不少蝕眾恐觸官法不敢全貨于市因擊破以鬻
之復塞其冢以滅跡自是銅器不復出矣

黃堆冢在河亶甲西南世傳乃河亶甲后之冢也

魏武高平陵在鄴鎮西南三十里周回二百七十步高
一丈六尺十二月余登銅爵臺西望荒郊煙樹永甯寺
僧指示余曰此曹公之西陵也

曹操疑冢在滏陽縣南二十里曰講武城壁壘猶在又有高臺一所曰將臺城外高邱七十二所參錯布置纍然相望世云曹操疑冢初操之葬以惑後人不致發掘故也冢間有曹公廟殿屋甚華麗廟北一高邱之前鉅碑一通螭首龜趺齊忠王之碑姜一芝所撰云西望西陵不十餘里煙樹歷歷可見十二月余按轡其間自午抵暮縱橫出入墓中不知所向噫何其用心之詐也使操能見武侯八陣圖則有愧多矣

朝陽陵在臨漳縣鄴鎮東北九里卽魏文帝文昭皇后河朔訪古記
卷中
朝陽陵也按魏略甄后中山無極人初嫁袁紹子熙及魏武帝破鄴文帝時爲太子因納爲夫人生明帝爲郭后所譖賜死後文帝以郭后無子詔爲養子明帝以母不以道終意甚不平嘗從文帝獵見子母鹿文帝射殺鹿母遂使射其子帝曰陛下已殺其母臣不忍復殺其子因涕泣文帝收弓矢大奇之而建儲之意遂定及帝卽位追諡曰文昭皇后太和四年使太常卿甄霞持節改葬于朝陽陵今陵旁一冢父老曰李夫人冢后與夫人甚相善故得耐葬焉

安陽縣東四十里永和鎮城西二百步漢樂巴廟在焉
范蔚宗漢書樂巴魏郡內黃人也好道而性質直順帝
世累遷爲太守後爲尙書以上書極諫起憲陵侵毀小
民墳冢下獄禁錮還家及陳蕃實武輔政召拜議郎蕃
武被誅巴復上書極理其寃帝怒下詔切責收付廷尉
巴自殺遂歸葬而邑人于此立廟云墓在鎮東南二十
六里周回一百步高二丈云

晉嵇侍中廟墓湯陰縣西南一百二十步曰浣衣里道
左小碣題曰晉忠臣嵇紹之墓墓周回二百步高二丈

河朔訪古記

卷中

三

餘廟在墓側有宋碑一通乃淮南節度使司徒兼侍中
判大名府兼北京留守司事大名府路安撫使魏國公
韓琦記并書熙寧三年八月十五日縣令張琳立石其
碑曰夫以忠事君人臣之常分也然遭大變臨大節或
心無所主爲禍福所動以苟一時之生而貽萬世之戮
者多矣若其鼎鑊在前鋒刃加己能挺然知義之所在
分固當爾輕其命若鴻毛然卒死而不顧者幾何人哉
惟晉侍中贈太尉忠穆嵇公則其人也方惠帝昏弱諸
王肆亂各萌僭奪以相屠害故帝之北征也公馳赴行

在力當國難而成都王穎以兵犯乘輿衛從奔散獨公
端冕侍側以身扞帝至血濺御衣而殞嗚呼公之知義
明分可謂得其死不爲難也故其大忠偉節赫然與日
月爭光峯然與山嶽爭高天地不可窮而公名亦不可
窮矣宜乎百世之下有國家者欽遺風想餘烈置祠奉
祀永遠不絕也相之湯陰卽公死難之所其廟在焉前
之爲邑者不知追顯忠義爲政所先因循不葺底于大
壞今令張君琳至則首拜祠下觀其隳敝之甚驚而嘆
曰茲不職之大者也亟舉公事跡與夫朝廷崇祀之意

河朔訪古記

卷中

三

諭于邑民皆欣然願共力以完之令乃寬與之約聽
其營辦不數月而祠宇一新于是民益知夫賢人之忠
于國者雖死于不幸後世必載祀典嚴廟貌奉事尊仰
之如此皆思勉而爲善自一邑而推諸一郡繇一郡而
推諸四方則其爲勸也豈小補哉廟完具書來告以余
嘗兩守鄉邦願志本未噫忠義之心人皆有之但勉而
不力執之不固遂不至于古人余亦勉而執之者跂忠
穆之風尤寤寐以自激文雖甚陋惡敢吝而不書又晉
書載公死難血濺御衣事平左右欲斡所衣帝曰此積

侍中血勿去詔葬縣南賜曰澣衣里仍立廟焉廟有國朝翰林承旨鹿菴王磐律詩一首曰十載家艱恨未消又持手版事昏朝已知定亂功難就猶幸臨危節可要忠血數斑霑藻火英名千古迫雲霄一盃欲酌祠前土野鶴昂藏未易招磐字文炳廣平人亡金進士入國朝累官至承旨致仕居東平年九十二歲卒諡曰文忠十

二月早至湯陰南門拜謁廟墓讀碑而去余嘗讀趙文敏公松雪齋文集有紀夢嵇侍中曰延祐元年十一月十九日彭德朱長儒道其邦人之意求書晉嵇侍中之

河朔訪古記

卷中

廟六字余每敬其忠節不辭而書之運筆如飛若有神助是夜京口石民瞻館予書室中夢一丈夫晉人衣冠蓬首玄衣流血被面謂民瞻曰我嵇侍中也今日趙子昂爲余書廟額故來謝之民瞻旣覺猶汗流亦異事也翰林學士承旨榮祿大夫知制誥兼修國史吳興趙孟頫志

臨漳縣南鄴鎮西北五里紫陌側晉高僧佛圖澄墓在焉澄天竺人俗姓帛氏永嘉年來洛陽雖未嘗讀儒家書與一時學士辨論無能屈者澄身長八尺腹旁一竅

常以絮塞夜欲讀書則拔其絮竅中光出照于一室又常至水際引腸滌之還內腹中善誦神咒役鬼神以麻油雜燕支塗掌上則洞見千里外事令齋戒者皆得見之又能聽鈴音以言吉凶無不驗后勒兵屯葛陂大殺沙門澄匿勒大將郭黑略家黑略言于勒召試道術取鉢水咒之生青蓮花勒由是信之勒之獲段末波擒劉曜皆先驗澄之鈴音也至石虎傾心敬事使衣綾錦乘雕輿太子常侍皆舉舉扶翼升殿主者唱大和尚羣臣皆起以彰其尊後虎大饗太武殿澄吟曰殿乎殿乎棘

河朔訪古記

卷中

天

子成林壞人衣平虎發殿石視之果有棘生焉澄意本在冉閔小字棘奴也澄還寺獨語曰得三年平自答不得又曰得二年一年百日一月平自答不得遂不復言謂弟子曰戊申禍亂漸萌己酉石氏當滅吾及其未亂先化去矣遣人與虎辭虎詣寺見澄澄曰出生入死道之常也修短分定非所能延今意未盡者以國家心存佛理崇顯寺廟宜享休祉奈何布政猛烈終無福祉若降心易慮惠此下民則國祚延長道俗慶賴歿無恨矣虎知必逝悲慟嗚咽卽命于漳水西紫陌鑿壙營壽藏

十二月八日澄卒于鄴宮寺是歲晉永和四年也後有沙門雍州來稱見澄西入關虎發墳視之惟一石虎惡之曰石者朕也葬我而去吾將死矣明年虎果死

湯陰縣北十里有古壘南北斜長五里父老云唐九節度師營壘也壘東北有萬人冢卽九節度潰兵之遺骸乃節度使薛嵩掩骨作此大冢命幕府御史陸長源撰記刻碑立冢上云

安陽縣西北五十里永治村魏國韓諫議墓在焉諫議丞相忠獻公父也神道之碑則樞密使富弼撰翰林承河朔訪古記

卷中

五

旨王珪書碑首題曰宋故大中大夫行右諫議大夫南陽郡開國男贈開府儀同三司太師中書令兼尙書令魏國公韓公神道碑銘其碑略曰公諱國華字光弼太宗初中興國二年甲科授大理評事通判瀘州遷右贊善大夫改彰德節度判官盡抉姦隱諸豪不敢犯升祕書省著作郎監上蔡稅以監察御史召望高臺閣屬天子議復燕薊揣廷臣勇而善辭令者諭高麗西攻契丹以分其力旣曰非韓某不可卽假以太常少卿爲使公馳舸至其國其王負固不受命公諭以禍福王大恐遣

大將領兵數萬渡湏江以侵契丹公復命天子大喜拜
左拾遺直史館賜五品章服兼判登聞鼓院入三司爲
開封推官遷左司諫充鹽鐵判官久之契丹大將蕭甯
使叩雄州約戰知州雷福信之以聞天子因思高麗功
立命公走雄州按其事亦令代福作報書索其情僞甯
之意欲我先發公固願息兵養民念國體不可屈書乃
謝使者急令備邊還奏天子又大喜歷判鹽鐵度支戶
部三司院有密讒于帝者帝雅信公詔總判三司賜三
品章服公益奮條三司不便事二十七上之官民偕利

河朔訪古記

卷中

三

遂著爲法俄而出爲京東轉運副使卽拜峽路轉運使
眞宗卽位入判大理寺秩凡五遷爲職方郎中出知河
陽徙潞州契丹入掠河朔公以精騎屯吳二谷契丹不
敢犯境帝嘉之褒以璽書契丹再至澶淵首命公假祕
書監爲國信使江南饑又遣巡撫一道還朝權開封府
判官出知曹州徙泉州天子封太山擢諫議大夫召歸
道病卒于建陽驛泉人聞之傾一州來會哭朝廷舉卹
典賜一子官公六子球德清尉琪將作簿琚兩浙轉運
琬河陽參軍璩祕書著作郎不幸繼亡琦相仁宗皇帝

被遇今天子立爲門下侍郎兼兵部尙書同中書門下
平章事昭文館大學士魏國公望重天下勛冠列辟以
公積德儲慶所宜享厚報然恨公早世不克待其發而
發于丞相丞相以似以繼其傳之者其可涯邪銘曰士
孰不官公官獨難使臨東夷跨海渺漫指揮出師勢分
狄患王始倔強恃遠且艱視詔揀刺不奉其虔公怒移
書以訶以譎諭以禍福日月之觀王雖島首聞義惕然
發兵饋糧革頑易慤對廬褥薩伏命館門能俾遠人舉
國奔職不憚已勞不畏鄰隙又俾強敵斂其毒螫二邦

河朔訪古記

卷中

三

由公一舉斯得繼走朔郵議收弋殘坐策立判敵姦不
施不爲其款國不挫威兩使外禦天子再怡出知四州
大用是宜而卒不用讒人之爲復不永年道卒不歸遐
邇奔赴與考同之位不都躬萃于幼嗣曰將曰相勲德
名世本忘源流公得何異何以畀之天相其類天實使
然人亦靡然書之寔然其昭昭然

劉神川先生墓安陽縣南門焦道菴士劉神川先生墓
殯之所也先生名祁字景叔潭源人金狀元南山翁攜
之曾孫正大閒監察御史從益字雲卿之子先生與弟

郁字文季皆以文章德行馳譽大河南北後寓輝州甲
辰尼瑪哈中書招置幕下年四十七卒有神州遯士集
行世又著歸潛志以紀金末喪亂之事與太原元裕之
壬辰雜編關西楊奐然天興近鑒東明王百一汝南遺
事微有異同今修三史金國之事蓋多取其語云

河朔訪古記

卷中

三

河朔訪古記卷中